

Alþingi
Erindi nr. P 131/506
komudagur 6.12.2004

Garði 6/12 2004

Iðnaðarnefnd Alþingis

Frumvarp til raforkulaga, 328. mál.

Umsögn Sambands garðyrkjubænda.

Samband garðyrkjubænda gerir ekki efnislegar athugasemdir við hjálagt frumvarp nr. 65/2003, með síðari breytingum en vill í ljósi aðstæðna koma eftirfarandi á framfæri.

Samband garðyrkjubænda lýsir áhyggjum vegna þeirra breytinga á umhverfi raforkusölu sem boðaðar eru 1. janúar næstkomandi.

Þegar þetta er ritað (6/12 2004) liggur ekkert fyrir um verðskrá raforku til lýsingar í gróðurhúsum annað en það að þau sérkjör sem greinin hefur notið hjá Landsvirkjun falli niður. Hvort komið verði til móts við greinina með öðrum hætti, þ.e. í gjaldskránni sjálfri, eða með breytingum á niðurgreiðslum er óljóst á þessari stundu.

Í aðlögunarsamningi um starfsskilyrði grænmetisframleiðenda milli ríkisstjórnar Íslands og Bændasamtaka Íslands/Sambands garðyrkjubænda er kveðið á um niðurgreiðslur á raforku til greinarinnar og að verð á raforku sé sambærilegt við það sem í boði var þá (2002) erlendis og eru Noregur og Kanada nefnd sérstaklega í því samhengi.

Tollfrjáls innflutningur á samkeppnisvörum ylræktarbænda hefur leitt til þess að raflýsing í ylrækt hefur aukist. Samfelld framleiðsla allt árið er nánast skilyrði fyrir því að framleiðsluvörur greinarinnar séu samkeppnishæfar við innfluttar. Verð til neytenda hafa lækkað og má því segja að markmið þeirra breytinga sem gerðar voru á starfsumhverfi ylræktarinnar hafi náðst.

Í ljósi breyttra markaðsaðstæðna er ylræktin því mjög háð hagstæðu raforkuverði og ekki í stakk búin að mæta neinum hækkunum. Erlend samkeppni gerir það að verkum að ekki er hægt að flytja hækkanir á kostnaði út í vöruverðið.

Mikilvægt er að sú jákvæða þróun sem orðið hefur í ylrækt, með tilkomu raflýsingar, haldi áfram. Þekking og færni greinarinnar til framleiðslu á hágæðavöru er til staðar. Orkukostnaðurinn er stór þáttur í rekstrinum og má því lítið útaf bera til að rekstrarafkoman verði neikvæð.

f.h. Sambands garðyrkjubænda
Helgi Jóhannesson formaður